

بسم الآب والابن والروح القدس الاله الواحد
....أمين.....

بصلوات صاحب الغبطة والقداسة
الأنبا تواضروس الثانى
بابا وبطريك الكرازة المرقسية
بيت محبة الله بالزيتون.....يقدم .
من سلسلة مبادئ الروحية
الحلقة الثالثة:
كيف أقرأ الكتاب المقدس بطريقة مبسطة وعملية.

إعداد درامى وإخراج :
سمير فهمى

الراوي النهاردة يا أحبائي هانكمل الحلقة الثالثة في منهجنا "مبادئ في الحياة الروحية" كانت الحلقة الأولى كيف ابدأ حياة روحية تنمو وتستمر والحلقة الثانية كانت عن ضبط الفكر وتكلمنا عن اقل الحنفية وقل لا والصلاة السهمية وطريقة الطبيب النفسى. والنهاردة ها نتكلم عن موضوع مهم. التقصير فيه بيكون هو سبب التعب والضعف وعدم تكلمة الطريق الروحى وهو "كيف اقرأ الكتاب المقدس بطريقة مبسطة وعملية" وبفكركم ان المنهج متدرج وتراكمى وعملى يعنى علشان نستفيد لازم نسمع بترتيب الحلقات ونطبق الخطوات العملية وبنعمة ربنا لما تكمل معنا فى النهاية هتلاقى هدف نبيل يستحق إنك تعيش علشان

مشيل النهاردة هاروح لابونا باخوم عاوز اكمل الطريق اللى بدأتها

فار يجرى ومشيل يخاف ويجرى

مشيل اسم الصليب. باسم الأب والابن والروح القدس. إيه دا أول مرة اشوف فار في الطريق دا.

مشيل (بيفكر)...يا يا ترى إيه الفرق بينى والفار دا. مش دا برضه مخلوق (بيتسم مشيل) أنا خايف أكون فار وأنا مش وأخذ بالى. سلام يا قدس أبونا باخوم.

الراهب سلام يا مشيل إيه اخبارك؟

مشيل الحمد لله. من ساعة ما أخذت ازاي اتغلب على الأفكار الدنيا احسن كثير وخصوصا طريقة الطبيب النفسى والصلاة السهمية. بس مش عارف(يتلخبط في الكلام).

الراهب ما لك يا مشيل؟!

مشيل كنت عاوز اسأل سؤال غريب شوية يا أبونا باخوم؟

الراهب اتفضل خد راحتك يا مشيل يا ابنى.

مشيل : إيه الفرق بينى وبين الفار؟

الراهب(بيتسم) : يا ترى إيه هو الفرق. من وجهة نظرك يا مشيل؟

مشيل(يفكر) أفكر أنه العقل يا أبونا باخوم؟

الراهب : يتهى لى أن الفار عنده عقل برضه. لما تقفل الباب يدور على الشباك يخرج منه، لما يشوف حد يهرب، وفيه ناس عقلها صغير وفيه ناس عقلها كبير، دا حتى لو حد من غير عقل(مجنون يعنى) يفضل إنسان وليه حقوق الإنسان كاملة.

مشيل : طيب الفرق ايه يا أبونا باخوم؟

الراهب : الفار: جسد و نفس بس. لكن الإنسان، جسد و نفس وروح. فالفرق الجوهرى بين الفار والانسان هو الروح، فلما الفار يموت ينتهى، لكن الانسان لما يموت الجسد

بس اللى بي موت لكن تفضل الروح. وزى ما الجسد بياكل و يتغذى. الروح برضه محتاج تاكل و تتغذى.

مشيل : طيب والروح بتاكل ايه يا ابونا باخوم؟!!

الراهب الجسد يأكل لحمه فراخ، رز فول عدس، الروح تأكل كلمة الله. علشان كده الكتاب المقدس بيقول (ليس بالخبز وحده يحيا الانسان بل بكل كلمة تخرج من فم الله) فالخبز مهم لكنه مش كفاية. لان الإنسان مش جسد بس، الروح محتاجة تتغذى واللى مش ها يغذى روحه، روحه هاتتضعف و ممكن تموت، و يبقى جسد بس و روحه تكون ميتة زى ما بيقول الكتاب المقدس "ان لك اسما انك حي و أنت ميت (رؤ 3 : 1). والمثل بيقول "دا ميت بالحديا". ودا اللى بيخلى الملاحدين بيقولوا إحنا هانموت زى الحيوانات ما بتموت وما فيش حياة ابدية لأنهم مش بيعغذوا روحهم فبيبدأوا يعيشوا الموت من هنا.

ميشيل : ياه يعنى اللى مش بيتغذى من الكتاب المقدس بيكون كأنه مش إنسان!! دى حاجة صعبة خالص. **طيب قل لي يا أبونا باخوم طريقة سهلة علشان أبدأ واستمر في قراءة الكتاب علشان فيه أوقات أبداً وماستمرش أو اقرأ وما ستفدش.**

الراهب قبل ما أقولك على ازاي تقرأ هاكلمك عن فوايد كلمة الله علشان الواحد لما يكون مدرك أهمية اللى بيعمله هو دا اللى يخليه يستمر. فيه ثلاثة فوائد يا مشيل للقراءة في الكتاب المقدس أول فائدة أنه تغذية. فمكتوب في (تث 8 : 3).

صوت الله "ليس بالخبز وحده يحيا الإنسان بل بكل ما يخرج من فم الرب يحيا الانسان **الراهب :** هاحكى لك قصة يا مشيل يا ابني. هاجر شخص فى القرن 19 لامريكا وهناك قالوا له

شخص : زى مانت شايف. الدنيا واسعة هاتخذ مزرعة وحمار وثلاثة بقرات، تزرع قمح ليك وتزرع برسيم للحمار والبقر، لكن خلى بالك بتيجى أوقات بتحصل مجاعة ومحدثش بيبع قمح، فاعى تنسى تزرع قمح كفاية.

المهاجر : اكيد طبعا لازم نزرع قمح امال ها نعيش ازى!!

الراهب : لكن مع الوقت كتر البقر، وبدا يزود فى مساحة البرسيم و يقلل مساحة القمح

صوت بقر كثير وعنم

المهاجر ياه عندنا بقر كثير مش محتاجين نزرع قمح عاوزين مساحة كبيرة تكفى البقر **الراهب** وفي سنة من السنين حصلت مجاعة وخلص القمح وحاول يشتري لكن محدش يرضى يبيع له.

المهاجر(بيكى) انا جعان، عاوز قمح، انا تعبان، حد يدينى قمح بأى تمن يا ناس!!
أنا جبته نفسى!!! ليه مازرعت قمح وزرعت كل الأرض برسيم. اعمل ايه دلوقتى
آكل برسيم. ممكن تدينى قمح يا عم يوسف

شخص : كل و احد بيكفى نفسه.

شخص كبير : ليه ماكنتش حكيم يا ابنى وأخذت بالك من نفسك وزرعت قمح.

المهاجر : اه انا تعبان ، انا جوعان ، ها موت ها موت

الراهب : وفعلا فى يوم كان فيه ناس معدية جنب المزرعة لقيوه ميت وجانبه الحمار كمان ميت فقالوا

ناس : مسكين مات الحمار ومات الراجل زى الحمار.

ميشيل : ياه مات الرجل زى الحمار. ياه معقولة

الراهب : دا مكتوب في سفر اشعياء (اش 1 : 3)

اشعياء الثور يعرف قانيه والحمار معلف صاحبه أما إسرائيل فلا يعرف شعبي لا يفهم

الراهب فاللى مش عارف مصلحته ومش عارف أن تغذية روحه مهمة مش محصل حتى حمار ولا ثور زى ما بيقول الكتاب.

مشيل مش الناس ممكن تزعل لو قلنا اللى مش بيقرا الكتاب يشبه الحمار

الراهب طبعا هايذعلوا لو قلنا اللى مش هايقرأ الكتاب تموت روحه وهايشبه الحمار لكن مش هايذعلوا لو قلنا اللى مش هايقرأ الكتاب هايبعد عن المسيح ويروح جهنم. لانهم عايشين على مستوى الجسد. محتاجين فكرنا يتغير ونفكر شوية على مستوى الروح مش مستوى الجسد.

مشيل ياه!! فعلا الواحد بيزعل لو حد قال انه يشبه الحمار وما يزعلش ولا يتأثر لو انه هايروح جهنم. فعلا حاجة عجيبة ماكنتش واخذ بالى منها. فيه حاجات كتير محتاجة تتغير جوايا.

الراهب وأنت هاتزرع قمح واللى هاتزرع برسيم يا مشيل؟!!

ميشيل : هازرع قمح طبعا.

الراهب تزرع الاتنين يا مشيل. نهتم بالجسد ونهتم بالروح، لكن نبقى عارفين أن حياتنا فى الجسد مهمة ومهمة نهتم بيها لكن نبقى عارفين برضه انها مؤقتة، لكن حياتنا فى الروح هي بداية الحياة الابدية من هنا وكل يوم نغذى الروح بكلمة الله واللى مش هيقرأ الكتاب كل يوم هانتضعف روحه شوية شوية ومش هايقدر يقاوم الخطية، فنتدخل جواه وتفسد حياته ويموت و هو حى.

مشيل : طلع الموضوع كبير يا أبونا باخوم ، و أنا باقول ليه انا ضعيف قدام الخطية علشان مش بأتغذى كويس من الكتاب المقدس.

(مشيل بيسرح ويكلم نفسه)

موسيقى مناسبة للصلاة

"اه يارب يسوع سامحنى على اهمالى وكسلى وبالرغم انى بأهتم وبعمل حاجات كتير مش مهمة وبضيع وقت كتير في الفيس والنت والأفلام واللعب وكل حاجة ليها

وقت عندى إلا الانجيل بانسأه وأقول مافيش وقت وعأيش ضعيف قدام الخطية
والحقيقة مش عأيش. افكر نفس حر لكنى عبد لخطايا كثير مش قادر عليها كأنى
فعلا مش انسان. سامحنى يارب سامحنى يارب على كسلى وإهمالى، ساعدنى
علشان افهم ان كلمتك هى الحياة ومن غيرها انا ميت. قوينى علشان اهتم وماكسلش
تانى يارب يسوع

.....موسيقى.....

نور

الراهب : مالك يا مشيل سرحت في إيه؟
مشيل سرحت في الكلام اللى بيتقول هولى يا ابونا ضعيت سنين كثير وانا مش فاهم
وعأيش ضعيف ومش باتغذى من كلمة الله. وكنت فاكّر نفسى عأيش لكن ما كنت
عأيش. طيب وإيه الفائدة الثانية لكلمة الله يا أبونا باخوم؟.

الراهب أول فائدة للكتاب أنه تغذية وتانية فائدة يا مشيل أنه نور زى ما هو مكتوب فى
(مز 119 : 105)

داود النبى "سراج لرجلي كلامك ونور لسبيلي".
الراهب فكلام الرب هو نور لينا في ظلمة الحياة واللى هأيهمل في معرفة الكتاب
هأيعيش في ظلمة ويكون عبد لابليس. كان فيه شاب فى الصعيد كان رايح يروى
القصص بتاعه بالليل وأهله قالوا له

(صوت قصب و رياح)

أبوه خذ معاك الكشاف دا علشان الجو ليل
الشاب لا انا متعود على الطريق
الأم___ليه يا ابنى دا فيه عصابات بتخطف الناس زى م أنت عارف
الشاب لا ما يهيميكش ابنك سبع ومش بيخافش من حد
أبوه___إحنا عارفيناك سبع بس خذ كشاف علشان تشوف الطريق ومتمشيش فى حطة
غلط

الراهب لكن مسمعش الكلام وبدا يمشى وسط القصب ودخل فى طريق غلط وبالرغم انه
كان فيه أثار كثير بدل على انه ماشى غلط لكن الجو كان ظلمة ومكانش معاه نور و
من غير ما يحس لقى نفسه وسط العصابة

(صوت قصب و رياح)

الابن أنا خايف. أنا مشيت في حطة غلط ولا إيه ياريتنى كنت جبت معايا الكشاف وكنت
سمعت كلام أبويا.

صوت هجوم عصابة

العصابة___امسكوه . اربطوه . هاها . جيت برجليك

الشباب لا لا. سيبوني . سيبوني . ما تقدرش على
العصابة مش ها نقدر عليك ، طب خد (يضربوه - ويربطوه) مش هانسبك لحد اهلك
ما يدفعوا مليون جنيه يا إما ها نموتوك

الراهب فاللى يهمل في قراءة الكتاب هايمشى في ظلمة وهايمشى في طريق الشر
ويروح لإبليس برجليه والشيطان هايربطه بالخطايا ونجاسات العالم وفي النهاية
هايموت. فالكتاب المقدس هو نورك وسط ظلام العالم. او عى تهمله لحسن تعيش في
الظلمة والشيطان يربطك ويخليك عبد لشرور وخطايا وفي النهاية تكون في ظلمة
أبدية.

مشيل علشان كدا شباب كتير بتصرخ من ضعفهم قدام الخطية والسبب أنهم أهملوا في
قراءة الكتاب فمشوا في الضلمة لحد إبليس ما ربطهم في الشر والنجاسة. لكن إيه
الفايدة الثالثة لقراءة الكتاب يا أبونا باخوم؟

3 سلاح

الراهب ثالث حاجة في أهمية الكتاب المقدس انه سلاح ، بولس الرسول بيقول في عب
12:4

بولس الرسول "كلمة الله حية وفعالة وامضى من كل سيف ذو حدين"
الراهب : فاللى مش هايمسك السيف بتاعه، هاينقلب و ينهزم قدام ابليس وهايكون عبد
للخطية و نجاسات العالم، والسلاح بتاعنا قدام ابليس هو كلمة الله. والرب يسوع لما
الشيطان جه يحاربه على الجبل ما كنش بيتفاوض معاه لكن كان يرد عليه بكلمة
واحدة

ميشيل : ايه هي يا أبونا باخوم؟!

الراهب : كلمة مكتوب ، فكلمة الله هي سلاح إن مسكته تغلب و ان سييته يغلبك ابليس و
يخليك عبد للخطية.

فى و قت حرب من حروب أوربا الحديثة، كان فيه جندى بيحارب على دبابة
تعمل بشعاع الليزر. فمجرد أن يظهر الهدف تتوجه ناحيته الدبابة وتستتنى ان
العسكرى يدوس على الزرار لاصابة الهدف، لكن العسكرى ده كان كسلان وماكنش
بيتدرب ازى يشغل الدبابة وكانوا يقولوا له

عسكرى : خد بالك ممكن تيجى الحرب وأنت مش مستعد تبقى مشكلة كبيرة

العسكرى الكسلان : وقت الله يعين الله. خليها على الله

العسكرى : ايوه لكن لازم تستعد لازم تجتهد وتدرب على السلاح الللى فى ايدك

صوت استعدادات حربية

الراهب : وفعلا فى يوم قامت حرب وحصل هجوم على كتيبة الجندى ولما جه يستخدم
الدبابة معرفش

العسكري الكسلان أه أه اعمل ايه مش عارف استخدم الدبابة انا قصرت انا مهمل ياه
هاموت هاموت

الراهب	وهجم عليه جيش العدو واخذوه اسير وربطوه بسلاسل، وبدأوا يذلوا فيه.
جنود	امسكوه اربطوه هانأخده أسير. هاهاها
الأسير	آه آه آه

الراهب واحنا برضه كده لو اهملنا فى سلاحنا اللي هو الكتاب المقدس ومعرفناش نستخدمه هانكون مذلولين قدام ابليس ويأسرنا ويذلنا بالخطية ونصرخ ونقول احنا تعبانين!! ليه مش قادرين نقاوم الخطية!! ودا كله علشان مهملين فى استخدام سلاحنا اللي هو الكتاب المقدس.

ميشيل : انا لازم ابدأ من النهاردة. كفاية اهمال وانشغال بأمور العالم. كفاية ضعف وذل قدام ابليس. طلع أن اللى مش بيقرأ الكتاب مش بيتغذى ومش بيدشوف ومش بيحارب يعنى زى ما يكون —سامحنى يا ابونا - حيوان أعمى ومشلول. قولى يا ابونا باخوم ازاي أبدأ عاوز طريقة عملية وسهلة علشان ابدأ كفاية كدا مش عاوز أكون كدا تانى أبدا.

الراهب: هأقول لك ثلاثة أمور تساعدك أنك تتغذى تغذية صحيحة من كلمة الله وتستخدمها كسلاح ونور علشان تنمو في حياتك الروحية وتتقوى قدام الخطية وتغلب أفكار إبليس.

..... موسیقی

**الراهب أول نقطة علشان تتغذى تغذية صحيحة هي
إنك تقرأ فى وقت محدد ومحدود**

مشیل: یعنی اِیہ وقت محدد ومحدود یا أبونا باخوم؟

الراهب: الإنسان بطبيعته بينسي، وعلشان نتغلب علي الذسيان في قراءة الكتاب يفضل إنك تقرأ في وقت محدد. يعني حدد أكثر وقت مناسب وثبتته وأقرأ فيه كل يوم.

مشیل و امتی یکون الوقت مناسب؟

الراهب الوقت المناسب يختلف من شخص للتانى، فيه شخص يناسبه في الصبح قبل الدراسة أو الشغل، لأنه بيصحى بدرى، ولكن واحد تانى بالعافية بيصحى علي ميعاد الشغل أو الدراسة فدا يكون وقت مش مناسب بالنسبة له. وفيه شخص يناسبه قبل النوم، بيكون مصحح، واحد تانى بيكون تعبان قبل النوم، وغيره يناسبه قبل الأكل،. فاختر أكثر وقت تلاقيه ملائم، والتزم به أشد التزام، دا كمان استमित فيه.

مثیل یعنی اِیہ استمیت فیہ یا اُبونا باخوم؟!

الراهب يعنى جاهد بكل قوتك حتى الموت إنك تنفذه. لأنه يا إما هاتستमित يا إما هاتموت من الجوع وتكون ضعيف قدام الشيطان وشهوات العالم. ولما تجاهد في النقطة دي مع الوقت هاتكون شىء طبيعى عندك، بأنك ماتخرجش من البيت من غير ما تقرأ

الكتاب المقدس، أو إنك ماتعرفش تنام أو تبدأ مذكرة غير لما تقرأ. هايكون زى الأكل مش هاتعرف تعمل حاجة قبل ماتأكل. فاتعب شوية في البداية لحد ما تبقى طبيعة عندك. فعلماء النفس والاجتماع يقولوا اعمل نفس الحاجة فى نفس الميعاد، فى نفس المكان، بنفس الطريقة، بعد 21 يوم، هاتكون طبيعة ثانية فيك مش ممكن تنساها بسهولة.

مشيل: ليه 21 يوم؟!

الراهب: لأن أعصاب المخ هاتتبرمج على كذا وهاتنتطبع فيها الحاجات دى فهاتكون رد فعل طبيعى. يعنى زى واحد اتعود كل ما يخرج من أوضته يقفل النور فهتلاقه بيعمل كذا حتى لو فيه حد موجود فى الأوضة. أو واحد تعود كل ما يدخل الأسانسير يطلب رقم واحد، تلاقه حتى لو فيه حد طلب رقم واحد يطلبه هو كمان. زى ما بيقول أحد الحكماء "نحن نضع عادتنا ثم تصنعنا عادتنا".

مشيل: شكله كلام حكيم لكن ايه معناه؟

الراهب: يعنى الواحد بيتعب علشان يحدد وقت للصلاة أو وقت للكتاب وممكن يكون فى الأول من غير تركيز كامل ومن غير مشاعر ولكن مع الوقت (ومش وقت طويل) هاتلاقى الأمور دى بقيت طبيعية فى حياته يعملها من غير مجهود لأنه اتعود عليها ويحب الصلاة والانجيل وينمو فى طريق القديسين وتبقى الأمور الروحية زى الإدمان مايقدرش يبطلها. والعكس صحيح.

مشيل ياه يعنى ممكن الأمور الروحية تكون إدمان!!

الراهب طبعا ممكن أحب الصلاة وقراية الكتاب وتكون زى الإدمان مقدرش أستغنى عنها. لكن فيه فرق فإدمان الأمور الشريرة تدى فرح مؤقت فى الأول وفى النهاية حزن وكآبة وفشل يزد يوم وراء يوم والواحد يموت بالبطنى لحد ما يموت الموت الأبدى. لكن الأمور الروحية تبدأ بتعب وجهاد ضد كسل الجسد وشهوات العالم وفى النهاية فرح وحرية يزدوا واحدة واحدة لحد ما يوصل الواحد للحياة الأبدية والفرح الأبدى

مشيل يعنى هندمن!! هندمن!! ياما للحياة الأبدية يا إما للموت الأبدى.

الراهب فعلا يا مشيل. فمثلا اللى يتعود على أمور سلبية ويبدأها كتجربة، بالرغم أنه فى الأول ممكن يكون مش بيحبها لكن مع الوقت يبقى مدمن مش قادر يبطلها وبرضة اللى يتعود يضيق الوقت قدام الفيس بالساعات مع الوقت ممكن يكون إدمان وميلاقيش وقت لتغذية روحه فيموت روحيا وكذا مع الأمور الإباحية، والعادات الشريرة كلها تبدأ بتجربة ثم تعود وبعدين طبيعة حياة نستعيد ليها. زى ما بيقول مار اسحق السريانى

مار اسحق رباطات النفس هي العادات التى يعتادها الانسان ان كانت بالجيد او بالردئ

مشيل: ياه ماكنتش مدرك لخطورة التعود والعادات، ولكن هل ممكن اتخلص من التعود على الأمور شريرة دى اللى بقت زى الادمان؟!
الراهب: بنعمة المسيح هانتكلم عنها بالتفصيل لما نتكلم عن سر قوة الشباب فالمسيح جه مخصوص علشان يحرر الانسان. **والبداية إنك تتغذى بالانجيل فمعلش هانتعب في الأول في وضع نظام محدد ومع الوقت يبقى طبيعة فيك وتبدأ تشبع بالانجيل وتحرر من أمور الشر فلما النور ينور الظلمة هاتختفى.**
فاتعب علشان تتعود على أمور تبنيك بدل ما تتساهل وتتعود على أمور تدمرك وتذل فيك.

مشيل: ويعنى إيه محدود يا أبونا؟
الراهب: كلمة محدد يعنى وقت ثابت وكلمة محدود يعنى كمية محدودة تقرأها كل يوم، أبدأ بكمية قليلة واستمر فيها أفضل من أنك تبدأ بكمية كبيرة وما تستمرش. زى ما بيقلوا "القليل المستمر خير من الكثير المنقطع".

مشيل طيب قل لى على نظام أبدأ بيه يا أبونا باخوم؟
الراهب أنت لىك قد إيه مقرتيش يا مشيل؟
مشيل.....كثير يا أبونا يمكن شهور.
الراهب تمام هانبدأ بداية بسيطة تناسبك. نبدأ بأية واحدة كل يوم. طبعاً اللى ليه نظام مستمر في القراءة يكمل فيه.

مشيل(مقاطعا) آية واحدة بس. مش كذا قليل اوى
الراهب معلش يا مشيل يا ابني امشى معايا خطوة خطوة علشان نقدر نستمر، فزى ما قلنا قبل كذا البداية مش كفاية المهم الاستمرار. آية كل يوم لمدة أسبوع والأسبوع الثانى آيتين والثالث فقرة والرابع نصف إصحاح وكمل على كذا سنة والسنة اللى بعدها اصحاح واللى بعدها إصحاحين. تتقدر تعمل كذا.

مشيل موضوع بسيط ممكن أقرأ أكثر من كذا كمان..
الراهب معلش ماتزودش عن كذا ولما ما تقرأش أكثر من أسبوعين إبدأ الموضوع من الأول آية وآيتين وهكذا.

مشيل وآية واحدة ممكن تبقى كفاية لتغذية حياتى الروحية!! مش ممكن أقول آية مش هاتؤثر وتساعدنى انى أهمل في قراءة الانجيل؟!

الراهب الطفل الصغير لو وكلوه معلقة زبادى وكوباية لبن كل يوم ممكن يعيش بيها.

مشيل ممكن يعيش بيها طالما طفل صغير.

الراهب لكن لو ماأكلش حاجة خالص ممكن يعيش؟

مشيل لا طبعاً أكيد هاي موت.

الراهب وانت كذا في حياتك الروحية ابدأ خطوة خطوة علشان تقدر تكمل وما تستهينش بالقليل وهو دا اللي هاخليك تعيش في حياتك الروحية ومع الوقت تنمو وتستمر وتكمل لكن لو مرضتتش بالقليل وماقريتتش خالص مع الوقت تضعف وتموت. وبولس الرسول بيقول (عب 5 : 12)

بولس الرسول و صرتم محتاجين الى اللبن لا الى طعام قوي

الراهب وفي (1كو 3 : 2) بيقول

بولس الرسول سقيتكم لبناً لا طعاماً لانكم لم تكونوا بعد تستطيعون

الراهب فانموا قليل قليل زى الأطفال واعرف أن الشيطان هايجاربك بالقفزات الروحية.

مشيل: وإيه هي القفزات الروحية يا أبونا باخوم؟

الراهب: الشيطان لما ما يعرفش يوقف العربية يدوس بنزين. يعنى لما ما يعرفش يجاربك

بالكسل هايجاربك بأنك تقفز وتقرأ كميات كبيرة ما تقدرش تستمر فيها فتكسل وتزهق وتبطل تقرأ خالص.

مشيل: إزاي يا أبونا؟

الراهب: يخليك تقرأ كميات كبيرة ممكن أسفار كاملة بالثلاثين والخمسين إصحاح في اليوم،

وبعدين يقول لك تقعد عليهم ثلاثين أو أربعين يوم ما تقرأش.

بعد الصوم الكبير في الصعيد كان فيه أسرة ذبحت خروف في عيد القيامة، فقال ابنهم الصغير

صوت لعب وفرح وعيد

شاب أنا أخذ نصيبي من الخروف وأأكله،

أبوه خذ اللي إنت عاوزه يا حبيبي

الشاب أنا أخذ ربع الخروف وهأكله كله مرة واحدة، علشان إحنا طالعين من الصوم الكبير.

أمه أهو موجود في الثلاجة ولما تحب تأكل كل اللي تقدر عليه

الشاب أنا هاخلصه في يومين

الراهب وفعلاً في خلال يومين كان أكل جزء كبير من ربع الخروف. صبح وظهر

وليل. المشوي والمسلوق. طبعا تعب وجاله عسر هضم. وبطل يأكل خالص وبعد

ثلاثة أيام شافه أصحابه تعبان

صديق مالك تعبان، باين عليك مش بتأكل كويس،

الشاب أكل إزاي!!

صديق تأكل زي كل الناس. ما بتأكل

الشاب أنا واكل ربع خروف.

صديق يعني إيه!!

الشباب يعني أقعد عليه أسبوعين أو ثلاثة من غير أكل.
الراهب هل فعلاً يقدر مايكلش أسبوعين أو ثلاثة اسابيع!!
مشيل: طبعاً لا ، دا حتى لو أكل جمل مش ممكن يقدر يقعد حتى ثلاثة أيام من غير أكل.
الراهب: علشان كدا أقرأ قليل باستمرار ولما تتحارب أنك تزود ارفض علشان ما يحصلكش تخمة وتزهق من الانجيل.

مشيل: بتيجي أيام بيكون ما ليش نفس أقرأ في الإنجيل يا أبونا باخوم. أعمل إيه؟
الراهب: اقرأ في الأيام دي حتى لو آية واحدة، اضغط على نفسك بقدر الإمكان، وزى ما هانعرف مراحل الصلاة أن فيه مرحلة أسمها مرحلة التغصب زى ما الرب يسوع قال "ملكوت الله يغصب والغاصبون يختطفونه" كدا برضة يا ابني في قراءة الكتاب المقدس اضغط على نفسك قليل قليل لحد ما ترجع لك المشاعر تاني، زى مابتيجي أوقات بيكون الواحد ما لهوش نفس يأكل وخصوصاً لما بيكون مريض أو تعبان ومرهق ولكن لازم يأكل حتى ولو بالعافية قليل قليل، علشان يخف من المرض.
مشيل: طيب فيه أوقات كتير بأقرا ومش بأفهم يا أبونا باخوم أعمل إيه؟
الراهب دي النقطة الثانية يا مشيل

.....موسيقى.....

الراهب: النقطة الأولى علشان تستفيد من الكتاب المقدس إنك تقرأ في وقت محدد ومحدود والنقطة الثانية هي إنك

تصلي صلاة الفهم

مشيل: وإيه هي صلاة الفهم يا أبونا باخوم؟
الراهب: كلام الكتاب المقدس هو رسالة الله ليك فاطلب منه أنه يفهمك ويعرفك إيه الرسالة اللي عاوز يقولها لك كل يوم. فكل يوم قبل ما تقرأ بص للسما وصى وقول
"يا رب علمني وفهمني عاوز تقول لي إيه النهارده"
وممكن تقولها بشكل ترنيمة

ترنيمة

الراهب فالفهم مهم جداً يا ابني وتكررت كلمة الفهم أكثر من 30 مرة في العهد الجديد فمكتوب في (مت 13 : 19)

الرب يسوع "كل من يسمع كلمة الملكوت و لا يفهم فيأتي الشرير و يخطف ما قد زرع في قلبه هذا هو المزروع على الطريق.

الراهب يعنى اللي هايقرأ من غير مايفهم يأتي الشرير ويخطف الكلمة وما يستفدش حاجة وما يكونش فيه نمو في حياته الروحية. لكن الكتاب يقول عن اللي بيفهم في (مت 13 : 23)

الرب يسوع . وأما المزروع على الأرض الجيدة فهو اللي يسمع الكلمة ويفهم و هو اللي يأتي بثمر

مشيل وازاى افهم يا أبونا باخوم!!

الراهب الله هو اللى بيدى الفهم فمكتوب في (لو24 : 45)"حينئذ فتح ذهنهم ليفهموا الكتب" وبولس الرسول يقول لتيموثاؤس في (2تي2 : 7) "ليعطيك الرب فهم في كل شيء"

مشيل: وازاى ربنا هايفهمنى ؟

الراهب: طالما طلبت ربنا فهو لازم يسمعك ويستجيبك. ويمكن اللى تقرأه النهاردة تستفيد منه بعدين بعد شهور أو حتى سنين، فتلاقى نفسك في يوم تفكر آيات وتستفيد منها في موقف معين وتكون قربتها من شهور أو حتى من سنين، فالوعد واضح في (أشع 55: 11)

صوت الله "كلمتي لا ترجع إلى فارغة بل تعمل ما سررت به و تنتج فيما أرسلتها له"
الراهب فالله ما عندهوش زمن. ماضى وحاضر ومستقبل. فكل شيء حاضر عنده. فلما تطلبه هايستجيبك وإحنا بنشعر ونستفيد بالاستجابة في الوقت المناسب حتى لو بعد سنين طويلة.

فى إيطاليا كان فيه واحد من أعضاء المافيا متخصص في سرقة البنوك دخل بنك قبل ما يقفلوا بعشرة دقائق وراح لأمين الخزنة وطلع مسدس وقال السارق مافيا. أنت فلان الفلانى ومراتك فلانة الفلانية وأولادك فلان وفلان. حط كل الفلوس هنا في الشنطة يا إما مش أنت بس اللى هاتموت لكن أنت وكل أسرتك! ها!!
الراهب امين الخزنة خاف وقال بتوع المافيا دول شرانيين اديلوا الفلوس واتسجن انا احسن ما تموت اسرتى كلها.

امين الخزنة(بخوف) خد خد

السارق بعد عشرة دقائق ممكن تصرخ. تستدعى البوليس. تعمل اللى انت عاوزه. لكن قبل كدا اعرف انك مش انت بس اللى هاتموت. فاهم!!

الراهب وفعلا اخذ الفلوس وكان مستتبه تاكسى أخده وراح بيه لمحطة القطر علشان يركب القطر الدولى من إيطاليا لفرنسا ووصل للقطر في اخر دقيقة وعلى ما ركب القطر اتقف الباب وطلع على طول وهو داخل سماع اتنين كانوا بيتكلموا مع بعض ولما اقفلوا الباب واحد قال لصحبه.

شخص أوه اغلق الباب. القطر هايطلع.

الراهب وكملوا كلامهم عادى، لكن الكلمة فضلت تتردد في ذهن الشخص اللى من أعضاء المافيا.

السارق(يتكلم في سره) اغلق الباب. اغلق الباب. ايه يعنى خلاص اغلق الباب. خلاص كلمة وانتهت شوف ها تقابل باقى أعضاء المافيا في فرنسا والا في سويسرا وازاى هاتختفى الفترة اللى جاية.

الراهب لكن الكلمة ما كنتش عايزة تطلع من دماغه

موسيقى ترجعه لذكريات الطفولة

السارق (بيكلم نفسه) اغلق الباب اغلق الباب. ايه سمعتها فين الكلمة دى. ياه قررتها زمان. قررتها في الانجيل لما كنت في أولى اعدادى. خمس حكيما وخمس جاهلات واغلق الباب وجاء الرب يسوع. طيب لو جه الرب يسوع دلوقتى هاكون فين. ياه كنت كويس كنت مواظب على مدارس الاحد ايه اللى ضيعنى كدا. لا لا لازم ارجع لازم اتوب قبل ما يغلق الباب.

الراهب وفعلنا نزل في اول محطة وركب القطار اللى راجع وقدام هيئة النيابة سسمعوا أغرب اعتراف في حياتهم. "وأغلق الباب" كلمة واحدة قراها في طفولته غيرت مجري حياته. فحاول انك تفهم يا ابنى اللى بتقراه ودى كلمة الله، فالله احسن حد ممكن يفهمك والطريقة سهلة انك تطالب. واعرف أن كلمة الله لا ترجع فارغة فحتى لو بعد سنين هاتستفيد منها. فافتكر كل يوم قبل ما تقرا انك تصلى وتقول "يارب علمنى وفهمنى عاوز تقولى ايه النهاردة".

ترنيمة

مشيل هاطلب يا أبونا هاطلب علشان افهم بدل ما بقرا من غير فهم فازهق وماكملش.

.....موسيقى.....

مشيل: وإيه هي النقطة الثالثة يا أبونا باخوم علشان استفيد؟
الراهب: **النقطة الأولى كانت في وقت محدد ومحدود والثانية صلاة الفهم** النقطة الثالثة هي ثلاث كلمات صغيرة ولكن عملية

عيش ومثل وصلى

مشيل: يعنى إيه يا أبونا عيش ومثل وصلى؟
الراهب: أول كلمة **عيش. يعنى نعيش الكلام اللى بنقرأه، وننفذ الوصايا ونطبقها في حياتنا.** زى ما بيقول الرب يسوع في (يو 6 : 63)

الرب يسوع "الكلام اللى أكلمك به هو روح وحياة"

الراهب وبرضة يعقوب الرسول بيقول في رسالته (1 : 22).

يعقوب الرسول كونوا عاملين بالكلمة لا سامعين فقط خادعين نفوسكم

الراهب زى ما يسمع الابن المطيع كلام أبوه الحبيب وينفذه ولأنه واثق أن كلام أبوه لخير ولصالحته وحتى لو كان صعب عليه في البداية ولكن لأنه واثق أن أبوه بيحبه و عارف مصالحته فيتحمل لحد مع الوقت يتعلم ويفهم. **لكن لو الواحد قرأ وماتطبقش يكون زى ما يكون واحد كل ما يأكل يتقيأ (يرجع) اللى بيأكله هل هاستفيد حاجة يا مشيل؟**

مشيل: طبعا لا. لكن ممكن تدينى أمثلة يا أبونا باخوم؟

الراهب: فيه واحد مثلاً يقرأ كلام الكتاب "لا تخرج كلمة قبيحة من أفواهكم" وبعدين يطلع بره البيت ويقول كل كلام لا يليق من كلام القباحة والسفاهة دا مش ها يستفيد حاجة دا فعلاً زى اللى بياكل ويرجع فهل يستفيد حاجة الشخص دا مهما أكل؟

مشيل: طبعا مش ها يستفيد حاجة. الصراحة مثال صعب يا أبونا باخوم.

الراهب: فعلاً حاجة صعبة فالشخص اللى بيقراً ويعرف الوصية وبعدين يعمل عكسها. زى ما بيكون شاب أبوه يوصيه وهو يقول حاضر يا بابا ويطلع يعمل عكس اللى قال له أبوه تماماً

مشيل دا زى ما بيكون بيغيظ أبوه. لكن افرض انه صعب إنه يطبق الوصية؟!!

الراهب طالما هو من جواه مش عاوز يكسر الوصية دا كويس جداً ولو ضعف وكسر الوصية يرجع ويعتذر وشوية شوية هايفهم ويتغذى ويتقوى ومحدث يقدر يغلبه أو يضحك عليه.

مشيل وازاى أعيش الوصية وأطبقها بالرغم من حرب الشيطان على؟

الراهب البداية تبدأ من الإرادة. يعنى إنك تبقى عاوز تطبق الوصية وتانى حاجة إنك تعرف إنك لوحدك مش هاتقدر وتالت حاجة إنك لو سقطت ماتتأس وماتبررش بل ترجع وتقدم توبة وتثق في الغفران الكامل مهما كانت خطيتك وتبدأ من جديد.

مشيل لكن فيه وصايا صعبة يا أبونا باخوم زى "أحبوا أعدائكم باركوا لاعنيكم" أطبقها ازاي. ممكن حد ظلمنى حد أعثرنى الموضوع صعب؟

الراهب موضوع الغفران هانخذ بالتفصيل في سلام الغفران. لكن البداية انك تقر بضعفك وانك مش قادر تطبق الوصية وتانى حاجة تطلب نعمة المسيح وتفضل تكرر الوصية وتقول "أحبوا أعدائكم باركوا لاعنيكم" وتصلى وتقول "ساعدنى اطبق وصيتك أنا يارب وحدي ضعيف". ومع الوقت هاتبدأ مشاعر الضيق وعدم القبول دى تقل لحد ما ييجى وقت وتختفي فيه المشاعر السلبية وتحل مكانها المحبة.

مشيل : والموضوع هايكون بالسهولة دى يا أبونا باخوم؟

الراهب : طبعا الموضوع مش سهل في بدايته لكن خليك جاد وعندك رجاء ومع الوقت هاتتغير طبيعتك لكن ركز انك ترد على الفكر الشرير بانك تكرر الوصية فزى ما بيقول أنبا مقار –

انبا مقار أن الوصية قوتها فيها.

مشيل يعنى إيه الوصية قوتها فيها؟!!

الراهب: يعنى مجرد إنك تكرر الوصية قدام ابليس هاتأخذ قوة وتنتصر. فالرب يسوع لما كان الشيطان بيحاربه ماكنش بيرد عليه غير بكلمة مكتوب. كان بيستخدم الوصية اللى الشيطان بيحاول يخليه يكسرها. وانت زى كدا لما الشيطان ييجى يحاربك

بالادانة مثلا كرر لا تدينوا فلا تدانوا ولما يحاربك بأنك تبص بصة شريرة كرر
ترنيمة العفة

ترنيمة (عهدا) 3 قطعت لعيني (فلا أطلع الى عذراء) 2
الراهب وكذا مع كل أفكار إبليس كل ما يبجي الفكر إفضل كرر في الوصية لحد ما
ينتهى.

مشيل: دا عن كلمة نعيش، طيب ويعنى إيه كلمة نمثل؟
الراهب: كلمة عيش يعنى إنك تعيش كلمة الله أى تعيشها وتطبقها فى حياتك اليومية.
أما كلمة مثل يعنى تأخذ دور في الجزء اللي هاتقرأه من كلمة الله، وتحط نفسك
داخل القصة اللي بتقرأها.

مشيل: ازى يا أبونا باخوم؟
الراهب: انت شوفت فيلم أبونا أندراوس الصموئيلي، وازى كان بيمثل قصص الكتاب
المقدس؟

مشيل: أيوه كان بياخذ دور الشخصيات ويمثلها
الراهب: انت برضة خذ لك دور في القصة اللي بتقرأها ومثلها.

زى قصة زكا، تخيل نفسك زكا، وصعدت للجميزة، والرب يسوع يمر من تحت
الشجرة اللي في أول الشارع وبص عليك وقال لك
الرب يسوع انزل يا مشيل. انا هاجى معاك النهاردة واقعد معاك وابيت عندكم في البيت
الراهب تخيل انك في اوضتك دلوقتى والرب يسوع معاك وقال لك علوز إيه يا مشيل يا
حبيبي. يالا خذ دقيقتين في سرك وابدأ احكى معاه

مشيل: أبدأ دلوقتى
الراهب: دلوقتى إبدأ. إتكلم معاه في سرك واعمل معاه حوار.

موسيقى تناسب الصلاة

مشيل (يتكلم في سره) يارب يسوع انا فرحان انك عندى في البيت انا مش مصدق نفسى.
بشكرك يارب انك بتحبنى بالرغم من خطيتى وسقوطتى الكثير والصرامة اللي
مشجعنى ومخلينى اصدق انك بتحبنى بالرغم من خطاياى ونجاساتى انك حبيت
زكا. لكن علوز زى ما غيرت زكا تغيرنى وزى ما حررته من محبة المال حررني
أنا كمان من كل شر وخطية وعادة ردية متسلطة على أنت طيب يارب وأب حنين،
اغفر لى كل خطاياى زى ما غفرت لزكا واديني ثقة انك غفرت لى كل خطاياى
وشرورى. انا باجيلك واللا صح دا أنت اللي جتنى يارب وأنا ماليش حد غيرك.
خليك معايا يارب مستبنيش ابدأ ابدأ يارب يسوع. أمين
الراهب خلصت.

مشيل.....بصراحة طريقة حلوة خالص كانوا اسعد دقيقتين في حياتي ما كنتش عاوز اخلص لكن خفت قدسك تزهدق منى. ممكن اخذ قصة تانية لو عندك وقت يا أبونا باخوم.

الراهب ممكن قصة الرجل الأعمى اللى كان جالس عند باب أريحا، وكان بيصرخ ويطلب من يسوع أن يشفيه، تخيل نفسك أنت اللى بتصرخ(اصرخ في شرك طبعاً) والناس ينتهرونك ويسوع يناديك ويقول لك **الرب يسوع تعالى يا مشيل عاوز إيه يا حبيبي انا مستنيك.**

الراهب يالا ابدأ تانى في شرك وشوف عاوز تقول له إيه قل يارب عندي بصر لكن عاوز بصيرة روحية اشوف ارادتك ومشيتك في حياتي واعمل معاه حوار. **مشيل تمام هابداً.**

موسيقى تناسب الصلاة

مشيل (في سره) يا رب يسوع أنا لي عينين بأشوف بيهم ولكني عاوز بصيرة روحية، عاوز أعرف إرادتك في حياتي وأتممها. عاوز يكون لى عينين بسيطة زى ما خلقتهم لي يارب بدلا من الشر والخطية اللى بتعميهم. فمش باشوف غير الشر والخطية، مش باشوف في الآخرين غير انهم سبب الشهوات أو بأدينهم. ادينى بصيرة نقية يا يسوع ماتسبش الشر يعميني وينجسني، حط اديك يا يسوع علي عيناى فيتطهروا ويكونوا ليك. أنا حاولت وفشلت، لكن لمسة من يديك يا يسوع تطهر، فزى ما أدبت الرجل الأعمى البصيرة أعطني بصيرة نقية وطاهرة يا ربى يسوع.أمين(خلصت يا ابونا)

الراهب كل قصة كدا في الكتاب المقدس خذ لك فيها دور هاتلاقى نفسك فرحان وتحس بالكلام وما ييقاش كلام وخلص. أصل الصراحة. الصراحة يا مشيل لو قرينا الكتاب المقدس كمجرد تاريخ وقصص اول مرة هايكون كلام حلو وقصص رائعة لكن تاني مرة هاتكون عارف الاحداث، تالته مرة هايبقى عندك ملل.

مشيل ياه هودا السبب اللى كان بيخلينى أمل من الكتاب المقدس علشان كنت باحس أنها احداث معروفة.

الراهب فعلا زى ما يكون واحد بيتفرج على ماتش كورة متعاد مش هايحس بالاثارة لانه عارف اللى هايحصل او زى اللى بيشوف فيلم حتى لو فيلم قديس، هاتشوفه اول مرة تفرح بيه، تانى مرة يقل الفرحة شوية، ومع الوقت ها تبقى عاوز تشوف حاجة جديدة. فالكتاب المقدس لو ما تحولش لحياة تعيشها وتدخل نفسك في الاحداث وتتفاعل مع المواقف وكأنه كتابك أنت وقصتك أنت مع الله من غير كدا مع الوقت هاتحس بالملل والزهدق.

مشيل لكن افرض ما كنش فيه قصص في اصحاحات معينة. زى رسائل بولس الرسول وكثير من العهد القديم أعمل إيه يا أبونا؟

الراهب: دى النقطة الأخيرة يا مشيل. إحنا عرفنا ازى نعيش ونطبق الوصية وازاى نمثل ونأخذ دور في الاحداث. وآخر نقطة هي أنك **تصلي**.

مشيل يعنى إيه أصلى يا أبونا باخوم؟

الراهب الأجزاء اللى مش هاتلاقى فيها قصص هاتلاقى فيها وعود، فالوعود حولها لصلاة واستخدمها في صلاتك. فالوعود ماكانتش لإبراهيم واشعيا وبطرس وبولس بس لكن لينا إحنا كمان فالكتاب بيقول "لان الموعد هو لكم ولأولادكم ولكل اللذين على بعد كل من يدعوه الرب الهنا"(اع2 : 39). فلو الوعود دى كانت ليهم هم بس كنا هانستفيد إيه من قرابتها غير الحسرة على حالنا وعلشان كذا ناس كثير تقول **صوت ناس** "فين إحنا من القديسين. ربنا كان مباركهم. كان عاطيهم بركة كبيرة. واحنا فينا منهم."

الراهب ويكون الكتاب بدل ما يكون سبب فرح يكون سبب حسرة ليهم.

مشيل يعنى كل الوعود والبركات اللى للاباء والرسل لينا احنا كمان زيهم بالظبط؟!

الراهب طبعاً يا مشيل يا ابنى. وعود الله لأولاده كلهم ما عندهوش فرق. هاقول لك على مبدا مهم جدا لو نفذته حياتك هاتتغير كثير جدا.

مشيل إي هو المبدأ يا أبونا باخوم؟

الراهب سر قوة الكتاب المقدس أنك تحوله لصلاة. وسر قوة الصلاة أنك تستخدم آيات الكتاب المقدس.

مشيل: ادينى مثال كذا يا أبونا باخوم؟

الراهب: مثلاً في (أش 1:43) يقول "لا تخف لأنى معك، دعوتك باسمك أنت لي". الوعد دا ما كنش لاشعيا النبي بس لكن لكل واحد يصدق ويطلب بيه.

مشيل طيب اصلى ازاي؟

موسيقى تناسب الصلاة

الراهب ممكن تقول "ماتخلينيش يارب أخاف انزع منى الخوف من المستقبل من المجهول من الشيطان حط يارب في قلبى سلام وخلينى اثق في فدائك وغفرانك لكل خطايى وخلينى اثق انى معروف باسمى عندك مش مجرد واحد من مليارات وانك بتهتم بى اهتمام خاص. وخلينى أعيش ليك يارب مش للعالم ولا لاهوائى وشهواتى ليه يا رب سايب العالم وشواته يدخل جواى؟! ليه يا رب تسبب الشهوات تذلى؟! ماتسبنيش يارب حتى لو انا سيبتك ما تسبينيش رجعى تانى ليك انا ملك ليك وانت مسئول عنى كل أيام حياتى يارب يا يسوع. آمين

مشيل: كلام عميق جداً يا أبونا، وصلوات جميلة.

الراهب تحب تجرب وعد وتصلى بيه

مشيل ممكن بس هاصلى في سرى

الراهب ممكن. خذ مثلا الآية اللى في انجيل يوحنا "خرافي تسمع صوتي وانا اعرفها

فتتبعني وانا اعطيها حياة ابدية ولن تهلك الى الابد ولا يخطفها احد من يدي" (يو

10: 27 و28)

مشيل اجرب

موسيقى تناسب الصلاة

مشيل (في سره).....يارب يسوع انا من خرافك خلىنى اثق في كدا، لان الشيطان بيحاول

يخلينى اشك انك بتحبني وبترعاني علشان خطايي الكثيرة لكن خلىنى برضة اسمع

صوتك واتبعك مش اتبع شهواتي وشروري ولو بعدت انت رجعتي واديني ثقة في

الحياة الأبدية واني مش هاهلك ابدا طول ما انا معاك ومحدث يقدر يخطفني من

ايديك ابدا. آمين

الراهب.....فكل وعد من وعود الكتاب عامل زى شيك لو حولته لصلاة تصرفه وتستفيد منه

لكن لو احتفظتش بيه بس تكون زى ما يكون واحد معاه شيك بمليون جنيه ولكنه

عايش فقير ومش لاقى ياكل ولا يلبس ويمشى في الشارع ويقول

راجل (بيضرخ) انا راجل غنى وانا معايا شيك بمليون جنيه.

الناس طيب عايش فقير وحزين ليه!!

الراجل انا راجل غنى. انا ابويا ملك. دا انا معايا شيك بمليون جنيه.

الناس "ما باين عليك". ربنا يشفى. مش لاقى ياكل ويقول ابويا الملك ومعايا شيك

بمليون جنيه.

الراهب تفتكر الناس تقول عليه إيه؟!!

مشيل يتريقوا عليه ويحسبوه مجنون أو متخلف عقليا

الراهب اهو كدا كل شخص مسيحي بيدعى ان الله ابوه وانه بيقرأ في الكتاب ولكن مش

بيثق في الوعود ولا بيطالب بيها وعايش حزين وخايف هو مجنون.

مشيل دا فيه مسيحيين كتير عايشين مجانيين وهم مش عارفين وانا واحد منهم. ولكن

افرض ما لقيتش وعود أعمل إيه يا أبونا باخوم؟

موسيقى تناسب الصلاة

الراهب: حتى الكلام العادى ممكن نحوله لصلاة. يعنى مثلا اغلب رسائل بولس الرسول

بتبدأ "بولس الرسول عبد يسوع المسيح" فممكن تصلى وتقول "يارب بولس الرسول

كان عبدك ليك وخدمك بامانة خلىنى انا كمان عبد ليك يارب يسوع المسيح وأخدمك

بامانة كل أيام حياتي تعالي يا رب وجدد تحريري من الشر والخطية، خلىنى ارجع

لأحضانك مرة ثانية، أنت لا تشاء موت الخاطيء، أنت جيت علشان تحرر الأشرار

والخطاة، فتعالى يا يسوع وحررني، علشان أكون عبد لك مش للشيطان لأنه إيه الفائدة من أنه اسمي مسيحي، واسمك يدعى عليّ، وأنا مش باعمل مشيئتك بل مشيئة الشيطان توبني يارب فأتوب، **وزى ما غيرت بولس بعدما كان شخص قاتل لمبشر عظيم غيرنى وخلينى امجد اسمك وابشر بنعمتك واكرز بغفران وبملكوتك زى بولس الرسول**"

مشيل: كل دا في كلمة عبد؟

الراهب: أيوه يا مشيل، فمممكن تحول أي كلمة لصلاة عليك بس تبدأ حتى ولو بجملة واحدة تصلي بيها وشوية شوية هاتلاقى نفسك كل كلمة هاتأخذ منك صلوات عميقة تخليك تنمو في علاقتك بالمسيح. وافتكرك دايما ان "سر قوة الكتاب المقدس انه يتحول لصلاة وسر قوة الصلاة انك تستخدم آيات الكتاب المقدس" **تبقى لينا النهاردة تدريب مش الكل ها يقدر يعملها لكن اللي ها يعملها هایشعر بفايدة كبيرة لحياته الروحية.**

مشيل إيه هو يا أبونا باخوم؟

الراهب تدريب اسمه خريطة الحياة الروحية (الكشكول).

مشيل: وإيه هي خريطة الحياة الروحية أو الكشكول ؟

الراهب: أي حد كان يقعد مع أبونا بيشوي كامل كان ينصحه بتدريبيين اول تدريب هو صورة المسيح المصلوب ودا اتكلمنا عنه فى تقديس اللاشعور والأحلام.

مشيل: فعلا تدريب رائع يا أبونا انا جربته ولقيت نتيجة عجيبة فى تقديس الذهن والحماية من الأفكار الشريرة، وإيه التدريب الثاني يا أبونا؟

الراهب: التدريب الثاني هو الكشكول، يعنى تعمل كشكول يومي لحياتك الروحية. وتكتب فيه آية كل يوم وتأمل أو صلاه زى اللي صليتها دلوقتى لما أخذت دور زكا وتكتب ثلاثة حاجات.

مشيل: إيه هم يا أبونا؟

الراهب: أول حاجة حدث هام، أي حدث حصل في اليوم ولو ملقيتش حاجة مهمة قول رحى للكلية أو الشغل ورجعت، أو إن الله استجابك لطلبة طلبتها من زمان. تانى حاجة حرب روحية.

مشيل يعنى إيه حرب روحية.

الراهب حرب روحية يعنى تكتب "يا رب نجني من الأفكار الشريرة أو العادات الشريرة أو من القلق أو من الكبرياء أو الغضب أو أي شيء تتحارب به اكتبه وأطلب من الله أن ينجيك منه.

تالت حاجة اكتب طلبية. وهي ثلاثة أنواع :

أولا طلبية روحية زى الامتلاء من الروح القدس ، المحبة، الطهارة ، الاتضاع، الإيمان، الحكمة، القداسة، وإي أمور روحية زى كذا.

وتانى حاجة طلبه مادية زى أن الله يقف معك في الامتحانات، في عملك، اطلبه من أجل المستقبل، من أجل مشكلة.

مشيل: وهل أطلب من الله طلبات مادية؟ مش الله قال اطلبوا أولاً ملكوت الله.

الراهب: لما يحتاج واحد حاجة بيطلب من أبوه ولا من الجيران؟

مشيل: طبعاً من أبوه.

الراهب: الله هو أبوك اطلب منه كل احتياجاتك. والآية بتقول ملكوت الله أولاً أولاً مش

فقط!! فالله هو أبوك وحابب يستجيب لكل احتياجاتك اطلب منه أي حاجة خلى

ملكوت الله اهتماماتك الأول لكن برضة اطلبه حتي أصغر تفاصيل حياتك فهو يحب

كدا خليك معاه زى طفل صغير مع أبوه الحبيب أستنى منه كل يوم حاجة حلوة،

مشيل يعنى إيه كل يوم حاجة حلوة؟

الراهب: يعنى خليك زى الطفل كل يوم قل له "أيه الحاجة الحلوة بتاعة النهارده يارب"

واستنى من أبوك السماوي فتأخذ وتفرح وتشكر فتقرب إلي الله أكثر وأكثر وتنمو

حياتك وعشرتك معه. فالرب يسوع يتحدانا في يو 16: 24 ويقول

الرب يسوع " الى الان لم تطلبوا شيئاً باسمي اطلبوا تاخذوا ليكون فرحكم كاملاً

مشيل: وإيه النوع الثالث من الطلبات يا أبي؟

الراهب: الأولى روحية والثانية مادية والثالثة طلبية من أجل الآخرين .

مشيل: وهل أنا الضعيف أطلب من أجل الآخرين؟

الراهب: الله يستجيب طلبتنا من أجل الآخرين مش علشان قداستنا أو مستوانا الروحي

لكن علشان تحننه ورحمته. فالله لما يشوف حد يصلي من أجل شخص تانى يقول

"الإنسان الضعيف الغلبان يحب أخوه ويطلب من أجله بشكل دا" فيفرح ويستجيب،

فهو يستجيب من أجل محبتك للشخص. فأى شخص تلاقى أنك بتحبه صلي من أجله

حتي لو ما طلبش منك كدا. وافكر أن الله بيستجيب مش علشان خاطر قداستك لكن

علشان خاطر محبتك للشخص دا فهو إله المحبة والتحنن. ولسة قدام شوية هانخذ

حاجة اسمها صلاة الكرازة ودى مهمة جدا.

مشيل: معلومات جديدة علي يا أبونا، تعرفنى قيمة الصلاة ومعنى الصلاة وتشجعني أن

أصلي من أجل أسرتي ومن أجل أصدقائي ومن أجل اللى أعرفهم وأحبهم وأستغل

الوقت المقتول بدل من أن يضيع فى اللاشئ.

الراهب: **نلخص اللى قلناه. فيه ثلاثة حاجات في أهمية الكتاب المقدس**

مشيل: تغذية ونور وسلاح

الراهب: وثلاثة خطوات عملية في القراية اول حاجة

مشيل: وقت محدد ومحدود يعنى نثبت وقت ونحدد كمية

الراهب: تانية حاجة

مشيل صلاة الفهم " يارب علمنى وفهمنى عاوز تقول لى ايه النهاردة"

الراهب ثلاثة حاجة

مشيل عيش ومثل وصلى

يعنى نعيش الوصية ونمثل المواقف ونصلى بالوعود والكلمات

الراهب نتقابل المرة الجاية يا مشيل ونكمل كلامنا عن محبة الله الغير مشروطة سلام يا مشيل.

الراوى وإلى اللقاء أحبائي الأفاضل في الحلقة الرابعة من مبادئ الحياة الروحية حلقة محبة الله الغير مشروطة. إلهنا الصالح يحفظ لنا كنيستنا القبطية الأرثوذكسية وحياة أبينا الورع قداسة البابا المعظم صاحب الغبطة والقداسة البابا تواضروس الثانى. ولربنا القدوس المجد الدائم إلى الأبد أمين